

# Rombongan Persisi ke Festival Silat di Indonesia

PENCAK SILAT - 3 AUG 1982

**PERSEKUTUAN** Silat Singapura (Persisi) telah menghantar satu rombongan seramai 43 orang anggota untuk menyertai *Festival Silat Asean* kelima di Indonesia mulai semalam hingga 9

Ogos.

Rombongan Singapura — yang terbesar pernah dihantar oleh Persisi — terdiri dari 27 orang pendekar, dengan dua daripadanya wanita, dua orang wasit juri, tujuh orang guru silat dan tujuh orang pegawai.

Festival itu akan diadakan di Cirebon pada hari ini dan esok dan di Bandung pada 5 Ogos. Ini disusuli dengan Pertandingan Silat Olahraga Antarabangsa di Jakarta dari 6 hingga 8 Ogos.

## Beradu

Indonesia, Malaysia, Thailand, Filipina, Singapura dan Brunei akan menyertai festival itu yang merupakan pertunjukan kesenian.

Para pendekar negara-negara itu dan para pesilat dari Australia, Amerika, Jerman Barat dan Belanda kemudiannya akan beradu tenaga dalam pertandingan olahraga itu.

Ini merupakan julung-julung kalinya peserta-peserta dari Thai, Filipina, Brunei, Amerika dan Eropah mengambil bahagian dalam peraduan itu.

Kali pertama peraduan itu diadakan di Singapura dua tahun lalu di mana hanya tiga negara — Malaysia, Indonesia dan Singapura mengambil bahagian.

Sempena dengan festival itu, satu kongres Persekutuan Silat Antarabangsa (Pesilat) akan diadakan di Jakarta pada 7 dan 8 Ogos.

Dalam kongres itu berbagai aspek silat termasuk kegiatan silat, bahan-bahan bacaan mengenai silat dan usaha-usaha menggalakkan silat di negara-negara Asean, Eropah dan Amerika akan dibincangkan.

Setiausaha Agung Persisi, Encik Johari H.M. Uriff memberitahu Berita Harian, seramai 15 orang

pesilat akan menyertai bahagian olahraga, manakala 12 yang lain dalam persembahan kesenian.

Di samping itu, katanya, Persisi akan mempersembahkan satu pantomim silat selama 45 minit di Cirebon dan Bandung.

Pantomim itu akan mengisahkan asal-usul silat di Singapura, perkembangannya dan kisah bagaimana seorang belia menjadi minat kepada seni mempertahankan diri.

Menurut Encik Johari jenis silat yang dipilih untuk pertunjukan kesenian adalah dari silat bela diri hingga yang berunsur kebatinan.

Ini termasuk Macan Pasrah, Panca Sakti, Silat Gagak Sakti, Al-Haq, Setia Hati atau Esha, Silat Cekak, Seni Gayung Perwanit dan Perpensis (Persatuan Pencak Silat Singapura).

Penyertaan tersebut adalah atas undangan Ikatant Pencak Silat Indonesia (Ipsi).

Encik Johari menyatakan bahawa para pesilat dari Singapura telah mengadakan latihan yang bersungguh-sungguh sejak Mei lalu.

Rombongan dari Singapura itu yang berlepas semalam pagi, dipimpin oleh Encik A. Rahim Dayan.